

卷十八
山川志

同州府志

同州府志卷十八

山川志

黃河在同州府東自韓城縣東北入境南流至華陰縣北折而東逕潼關廳治北出境東岸皆山西境也西岸韓城縣與東岸河津縣榮河縣分河邠陽縣與臨晉縣分河朝邑縣與永濟縣分河華陰縣潼關廳與芮城縣分河今所志者皆西岸之水

一統志同州府黃河自延安府宜川縣流入逕韓城縣東十五里與山西河津榮河二縣分界又南逕邠陽縣

東四十里與山西臨晉縣分界又南逕朝邑縣東七里
與山西蒲州分界又南入華陰縣界

黃河自龍門山之北入韓城縣境南流錯開河之水自西
來注之

水經注河水又南至嶠谷旁谷東北窮澗水源所導也
西南流注于河河水又南洛水自獵山枝分東派東南
注于河昔魏文侯築館洛陰指是水也

水道提綱西岸有小水自西北來注之水出北池山西
麓南流經中池山之西麓折東南至東池山南入黃河

地圖記錯開河由龍門而上六七里卽金門其西有澗
曰冶戶川川口頗多鐫跡昔金門未闢崇伯不諳水性
意欲使河直行東北故失利耳書云鯀陘洪水疑卽謂
此也

韓城縣志龍門山北有河界似龍門而不能通相傳鯀
治水時所鑿今名錯開河續志錯開河在縣東北七十里

河源出朱砂嶺東北涓涓細流至八郎山與八郎溪水
合流始盛又東三峽水自西入焉至錯開河口爲冶戶
川舊產鐵置冶戶因名

按水經注南至嶠谷之文在南出龍門口之上龍門以北別無谷水入河似所謂嶠谷者卽今之錯開河也水道提綱之北池中池東池卽神道嶺東之五峙山土音訛峙爲池羣澗匯流西南注河與水經注之文相應其爲嶠谷無疑錯開河之名不知起于何時而縣志載之居然加諸伯鯨自是齊東之語亦由古名失傳遂至俗名滋謬也洛水枝分之說不解所謂獵山亦不知所在淮南子曰洛出獵山或是白於山之異名在今甘肅慶陽府境去龍門七百五十里洛

水初出中隔無數大山安能枝分而至龍門乎今本
水經注無洛水而寰宇記屢引之是宋代水經注本
有洛水篇而後世逸之也此段獵山枝分及文侯築
館云云蓋是洛水篇之逸文而錯簡于此耳錄而辨
之以俟精水道者

河水出龍門南流鬱水自西來注之

韓城志鬱水在縣北四十里卽白樊河源出東峙山東
流安國嶺南諸水歸之石溜成潭者五各深丈餘俗名
石甕溝又東逕鏵鎡山南又東逕林臯村北入于河又

南盤水河自西北來注之

水經注河水又南右合暢谷水水自溪東南流逕夏陽縣西北東南注于河

水道提綱盤水出韓城西北朱砂嶺南流有柳溝水自西北麻線嶺東南流經柳溝城西而東南來會又有白馬潭水自西南麻林山東流折而東北來會又東南有西池山水及南池野狐川俱自北來會又東南經縣西而南至芝川鎮入黃河又有一小水自西來亦于鎮南入黃河

按此說大誤盤水在韓城北二十里去芝川鎮四十里中隔韓山原二十餘里尙有至大之濠水閘之斷無至芝川鎮南之理蓋誤以濠水爲盤水也

韓城志盤水卽暢谷水源出西北西峙山東流逕牡丹山北洞溝南又東逕猿山北雲臺山南又東逕鳳凰山西爲盤道川又北行峽中逕上庄韓家山水自西北來

注之

韓家山北抱大川從東峙發源南小腸川從蝦蟆坎發源

出伏峯口又東逕

村鎮北又南逕薛曲里文水西來會之文水源出菩薩殿東流至文家山南至龍嘴頭與鳳凰山溪水合又東

逕吳村煖水入焉又東南入盤水又東南逕帶村東入于河

又南南谷水東注之

韓城志南谷水在縣北四里源出蘇山東流至苗莊入于河

又南逕芝川鎮東曰少梁渡卽古之瞿浮渡也濠水自東北合離水洫水澗水漚水潦水澮水芝水東南流注之

水經注河水又南澗谷水注之水出縣西北梁山東南流橫溪水注之水出三累山其山層密三成故俗以三

累名山按爾雅山三成爲崑崙邱斯山豈一崑崙邱乎
山下水際有二石室蓋隱者之故居矣細水東流注于
嶕谷側溪山南有石室西面有兩石室北面有二石室
皆因阿結牖連扃接闔所謂石室相距也東廂石上猶
傳杵臼之跡庭中亦有舊宇處尙髣髴前基北坎石上
有微涓石溜豐周瓢飲似是栖遊隱學之所昔子夏教
授西河疑卽此也而無以辨之溪水又東南逕夏陽縣
故城北故少梁也秦惠文王十一年更從今名矣王莽
之冀亭也其水東南注于河昔韓信之襲魏王豹也以

木罌自此渡河水又南右合陶渠水水出西北梁山東
南流逕漢陽太守殷濟精廬俗謂之子夏廟陶水又南
逕高門南蓋層阜墮缺故流高門之稱矣又東南逕華
池南池方三百六十步在夏陽城西北四里許故司馬
遷碑文云高門華池在茲夏陽今高門東去華池三里
溪水又東南逕夏陽縣故城南服虔曰夏陽虢邑也在
太陽東三十里又歷高陽宮北又東南逕司馬子長墓
北墓前有廟廟前有碑永嘉四年漢陽太守殷濟瞻仰
遺文大其功德遂建石室立碑樹垣太史公自敘曰遷

生于龍門是其墳墟所在矣溪水東南流入河昔魏文侯與吳起浮河而下美河山之固卽于此也

寰宇記崕谷水在縣南一里注于河

雍勝畧崕水出自西山東南流二十二里入黃河

韓城志崕水在縣西一里源出麻羨嶺東流過石門離水自南入焉又東過景村谷水自北入焉又東北過土嶺洳水自西北入焉又東出土門岸高口窄水勢迅急過邑城西轉而南其勢益激澗水自西入焉又南過陳村漑水自西入焉又南過馬頭山潦水自西入焉又南

過少梁澮水自西入焉又東南合芝水入於河芝川河
在縣南二十里源出方山東南流諸山水自西南來會
踰高家坡灤水自北來入焉又東過鉞薛遜水自西南
來入焉又東過呂莊沆水自西北來入焉又東過芝川
鎮南司馬祠北合灤水入河

按灤水卽水經注之嶠谷水寰宇記作嶠谷水嶠嶠
一聲之緩急皆俗字也實則應作澗水說文水部有
澗字卽是此水水經注橫溪水出三累山今不知三
累山之所在而橫溪水逕夏陽故城南漢夏陽故城

在今縣西南二里逕其南者獨有澗水是澗水卽水
經注之橫溪水也澗水出于巍山在縣西南四十里
孤巒獨聳根盤里餘與水經注層密三成語合或巍
山卽古之三累山與

又南入邵陽縣界曰茶峪渡

讀史方輿紀要茶峪渡在邵陽縣東河西故城南南去
瞿浮渡里許通山西榮河縣界

按茶與屠通韓奕之詩曰出宿于屠卽此地

又南百良水自西北來注之

郃陽新志百良水出梁山之芙蓉峯東南流逕百良鎮
東又東南入于河

又南橋頭水自西北來注之

水經注河水又南徐水注之水出西北梁山東南流逕
漢武帝登仙宮東東南流絕疆梁原右逕劉仲城北又
東南逕子夏陵北東入河

水道提綱黃河又西南經西岸郃陽縣東境有水二西

北自梁山東南流注之

一出梁山南麓東南流四十里
入河一出其西麓東南流八十

餘里入河此水河口
之南有山東臨大河

郃陽縣新志橋頭水卽徐水也源出梁山東谷東南流

逕仙宮村北名仙宮河

仙宮村卽漢登仙宮遺址

又東南流逕龍泉

村北又東南逕項村東北分爲二一正東流逕坊鎮北

卽劉仲城遺蹟

又東入于河其分出之小支西南流繞縣城東

而西南至劉家莊西折而東南合于金水河

按水道提綱所云二小水者卽百良水與橋頭水

又南一小水自西來注之土人呼曰洽水

郃陽記畧洽水在莘里村西同源而分流一出南澗一

出北澗自至村西合焉東逕合水橋又東逕子夏洞北

東注于河流絕後明時復出灌田數百畝

按此係土人杜撰之說郃陽舊志據之最爲無識辨
見古蹟釋郃

又南逕夏陽渡二漢水自西北流注之

水經注河水又逕郃陽城東周威烈王十七年魏文侯
伐秦至鄭還築汾陰郃陽卽此城故有莘邑矣爲太姒
之國詩云在郃之陽在渭之浹又曰纘女維莘長子維
行謂此也城北有漢水南去二水各數里其水東逕其
城內東入于河又于城內側中有漢水東南出城注于